

आकाशवाणी

खबरां ----

1. हैदराबाद दे गुजलार हाउस च अज्ज बडुलै अगग लगने दी घटना च 17 जनें दी मौत, राष्ट्रपति द्रौपदी मुर्मू ते प्रधानमंत्री नरेंद्र मोदी होरें हादसे पर दुख प्रगट करदे होई प्रभावितें लेई मुआवजे ते मदाद दी घोषणा कीती।
2. केंद्री गृह मंत्री अमित शाह होरें आखेआ ऐ जे पिछले 10एं बरें च केंद्र सरकार नै सेहत खेत्तर च मते बदलाव आंदे न। उनें सहकारिता समितिएं च नमें सिरेआ जान भरने दी जरूरतै पर जोर दिता।
3. संसदीय मामलें दे मंत्री किरण रिजिजू होरें ऑपेशन सिंदूर बारै दुनिया गी जानकारी देने ते पाकिस्तान दे झूठ दा पर्दाफाश करने लेई भेजे जाने आहले सर्वदलीय शिष्टमंडलै दी घोषणा कीती।
4. केंद्री राई-बाई मंत्री शिवराज सिंह चौहान होरें साइंसदानें दे तजुबे ते नमिएं काहडें गी जिमी सतह पर बरतून करियै राई-बाई दे खेत्तर च उछाल आहनने दी जरूरतै पर जोर भरेआ ऐ।
5. केंद्री मंत्री सर्बानंद सोनोवाल होरें आखेआ ऐ जे समुंद्री खेत्तर च महिलाएं दा सशक्तिकरण शडा समाजी बेरोजगारी दा मामला नेई सगुआं इस खेत्तर च नमिएं काहडें, स्थिरता ते विकास लेई इक बडुी जरूरत बी ऐ।
6. विदेश मंत्री डॉ. एस जयशंकर होरें कल्लै थमां नीदरलैंड, डेनमार्क ते जर्मनी दे 6 दिनें दे दौरे पर रवाना होआ करदे न।
7. IPL च अज्ज दिल्ली दे अरूण जेटली स्टेडियम च दिल्ली कैपिटल्स दा मकाबला गुजरात टाइटन्स कन्नै होग।

Hydrabad-Fire

हैदराबाद च चारमिनार कश स्थित गुलजार हाउस दी ईमारतै च अज्ज बड्डुलै चानचक्क अग्ग लग्गने दी घटना च घट्टोघट्ट 17 जनें दी मौत होई गई ते कई दुए घयल होई गए। अग्ग लग्गने दी जानकारी थ्होदे गै अग्ग स्हालने आहलियां 11 गड्डियां उत्थे पुज्जियां ते मती मशक्कत दे बाद अग्ग पर काबू पाया। अग्ग लग्गने दा कारण अजे पता नेई लग्गा ऐ। राष्ट्रपति द्रौपदी मुर्मू होरें इस हादसे पर गैहरा दुख प्रगट करदे होई घायलें दे तौले नरोए होने दी कामना कीती ऐ। प्रधानमंत्री नरेंद्र मोदी होरें हैदराबाद दे गुलजार हाउस च अग्ग लग्गने आहली घटना च 17 जनें दी मौत पर गहरा दुख प्रगट कीता ऐ ते मरोने आहलें दे परौआर आहलें गी प्रधानमंत्री राष्ट्रीय कोष चा 2-2 लक्ख रपे दी सींधी सहायता दी घोषणा कीती ऐ जिसले जे घायलें गी 50-50 ज्हार रपे दित्ते जांगन। तेलंगाना राज्य सरकार नै बी मारे गेदें दे परिवारें गी 2-2 लक्ख रपे देने दी घोषणा कीती ऐ। केंद्री कोयला खान मंत्री जी किशन रेड्डी होरें हादसे आहली थाहरै दा दौरा कीता ते प्रभावित परौआरें गी हर चाल्ली दी सहायता दा भरोसा दोआया।

<><><><><><>

Delhi-Fire

तोआई, अज्ज दपैहरी राजधानी दिल्ली दे पच्छिम बिहार इलाके च इक होटल च अग्ग लग्गने दी घटना पेश आई पर उत्थे कुसै जानी नुकसान दी कोई खबर नेई ऐ। अग्ग लगदे गै उत्थे अग्ग स्हालने आहलियां 5 गड्डियां पुज्जी गेइयां ते होटल दी त्री मंजल गी लग्गी दी अग्ग गी स्हालने च कामयाबी हासल कीती। घटना दे कारणें दी जांच कीती जारदी ऐ।

<><><><><><>

HM

केंद्री गृह ते सहकारिता मंत्री अमित शाह होरें आखेआ ऐ जे नरेंद्र मोदी सरकार नै बक्ख-बक्ख कार्जक्रमें राएं पिछले 10एं बरें च सेहत खेत्तर च सदा थमां मते बदलाव कीते न। गुजरात दे महेसाणा जिले दे गोजारिया च के.के पटेल ते मधुवेन के पटेल नर्सिंग कालेज दी नमीं ईमारतै दा उद्घाटन करदे मौके अमित शाह होरें आखेआ जे नर्सिंग कालेज च बधी दिएं सेवाएं दा लाहू कन्नै लगदे ग्राएं दे गरीब लोकें गी पुज्जोग। एहदे शा पैहले उनें बंद होई चुकी दिएं प्राथमिक कृषि दोआर समितिएं गी नमें सिरेआ आर्थिक तौरा पर मजबूत बनाने लेई इक नमीं नीति दी घोषणा कीती। अहमदाबाद दी साइंस सिटी च गुजरात राज्य सहकारी संघ आसेआ लोआए गेदे इक कार्जक्रम गी संबोधित करदे होई उनें आखेआ जे इनें समितिएं च नमें सिरेआ जान भरियै ग्रामीण इलाकें च राई-बाई दे खेत्तर च क्रांतिकारी बदलाव आंदा जाई सकदा ऐ।

<><><><><><>

Foreign Minister Germani

विदेश मंत्री डॉ. एस जयशंकर कल्लै थमां नीदरलैंड, डेनमार्क ते जर्मनी दी 6 दिनें दी जात्तरा पर जांगन। विदेश मंत्रालय दे वक्ता नै दस्सेआ ऐ जे डॉ. जयशंकर इनें त्रै देशें दे नेताएं कन्नै मुलाकात करडन। दपक्खीय सरबंधें ते आपसी हित दे खेत्तरीय ते वैश्विक मामलें पर व्यापक तौरा पर चर्चा होने दी बी मेद ऐ।

<><><><><><>

Romania-Election

रोमानिया दे मतदाताएं राष्ट्रपति दे ओहदे लेई मतदान करना शुरू करी दिता ऐ। चुनां च रोमानिया संघ दे गठबंधन दे नेता जॉर्ज सिमियन दा मकाबला बुखारेस्ट दे मेयर निकुसार डैन कन्नै ऐ। चुनां च धांधली ते विदेशी दखल दे आरोपें दे चलदे 2024 दे राष्ट्रपति दे ओहदे दे रद्द कीते जाने दे बाद एह परतिए चुनां कराने दा दूआ गेड ऐ। रोमानिया दी स्थाई चुनां अथार्टी मूजब मुल्खै च कोई 19 जहार

मतदान केंद्रें च वोट पोआए जाने न जेदे लेई योग्य मतदाताएं दी गिनतरी 1 करोड़ 80 लक्ख कोला मती ऐ।

<><><><><><>

IIT-Delhi

भारती प्रौद्योगिकी संस्थान आईआईटी दिल्ली नै अज्ज हाई स्कूलें दिएं कुड़िएं लेई विज्ञान, प्रौद्योगिकी, इंजीनियरिंग ते गणित दे क्षेत्र च अपना करिअर अपनाने लेई प्रेरित करने गितै इक विशेष जागरूकता कार्जक्रम “मनस्वी” दा सरिस्ता कीता जेदा मकसद इनें खेत्तरें च कुड़िएं दी गिनतरी च बाद्दा करना ते उनेंगी इनें खेत्तरें च अगड़े बधने दे मौकें बारै जागरूक बनाना ऐ। कार्जक्रम दौरान विद्यार्थिएं ते विषे दे माहिरेंबश्कार गल्लबात ते विचारें दा आदान-प्रदान बी होआ। छात्राएं इस कार्जक्रम च गैहरी दिलचस्पी दस्सी।

<><><><><><>

Rijju-APD

संसदीय कार्य मंत्री किरें रिज्जु होरें घोषणा कीती ऐ जे आप्रेशन सिंदूर दे तैहत 7 सर्वदलीय प्रतिनिधिमंडल तौले गै प्रमुख देशें कन्नै गल्लबात करडन। एह आतंकवाद दे खलाफ भारत दे सांझे संकल्प गी दर्शादा ऐ। इक्क सोशल मीडिया पोस्ट च रिज्जु होरें इस सांझे मोर्चे दी नुमायंदगी करने आहले सांसदें ते प्रतिनिधिमंडलें दी सूची सांझी कीती। इनें बक्ख-बक्ख समूहें च जम्मू-कश्मीर थमां वरिष्ठ नेता गुलाम नबी आजाद, नेशनल कांफ्रेंस नेता मिया अलताफ ते बीजपे दे गुलाम अली खटाना होर बी शामिल ना। आकाशवाणी संवाददाता नै जानकारी दिती ऐ जे भाजपा सांसद बैजयंत पांडा हुंदी अगुवाई च पैहला समूह साउदी अरब, बहरीन, कुवैत ते अल्जीरिया दा दौरा करोगा। इस प्रतिनिधिमंडल च भाजपा सांसद निशिकांत दुबे, ए.आई.एम.आई.एम सांसद असुद्दीन औवैसी ते वरिष्ठ नेता गुलाम नबी आजाद शामिल होडन। भाजपा सांसद रविशंकर प्रसाद हुंदी अगुवाई च दुआ

समूह यू.के, फ्रांस, जर्मनी, यूरोपीय संघ, इटली ते डेनामार्क दा दौरा करोग। इस प्रतिनिधिमंडल च कांग्रेस सांसद डॉ. अमर सिंह, शिव सेना (यू.बी.टी) सांसद प्रिया चतुर्वेदी, बीजेपी सांसद गुलाम अली खटाना ते साबका केंद्री मंत्री एम. के अकबर शामिल होडन। जनता दल (यू) सांसद संजय कुमार झा हुंदी अगुवाई च त्रीया समूह इंडोनेशिया, दक्खन कोरिया, जपान ते सिंगापुर दा दौरा करोग। इस प्रतिनिधिमंडल च तृणमूल कांग्रेस दे युसुफ पठान, CIP (M) दे जान ब्रिटास ते कांग्रेस नेता सलमान खुर्शीद शामिल होडन। शिव सेना सांसद श्रीकांता एकनाथ शिंदे हुंदी अगुवाई च चौथा समूह यू.ए.आई, लाइबेरिया, कांगो ते सिएरा लियोन दा दौरा करोग। बीजेपी दियां बांसुरी स्वराज, बीजेडी दे ससमित पात्रा, इंडियन यूनियन्स मुस्लिम लीग सांसद ई.टी मोहम्मद बशीर ते साबका केंद्री मंत्री एस.एस आहलूवालिया होर बी इस समूह दा हिस्सा होडन। 5में प्रतिनिधिमंडल दी अगुवाई कांग्रेस सांसद शशि थरूर होर करंगन जेडा अमरीका, पनामा, गुआना, ब्राजील ते कोलंबिया दा दौरा करोग। एहदे च जे.एम.एम सांसद सरफराज अहमद, एल.जे.पी सांसद शाम्भवी, टी.डी.पी सांसद जी.एम हरीष बालयोगी ते शिवसेना सांसद मुरली देयोरा शामिल होंगन। इसै चाल्ली 6में प्रतिनिधिमंडल दी अगुवाई डी.एम.के सांसद कनीमोझी करूणानिधि होर करंगन जेडा स्पेन, ग्रीस, Slovenia, Lavia ते रूस दा दौरा करोग। इस समूह च एन.सी थमां सांसद मियां अलताफ अहमद सने समाजवादी पार्टी थमां सांसद राजीव राय ते आर.जे.डी दे सांसद प्रेम चंद गुप्ता हिस्सा लैडन। एनसीपी (एससीपी) सांसद सुप्रिया सुले हुंदी अगुवाई च सतमा समूह मिस्र, कतर, इथोपिया ते दक्खनी अफ्रीका दा दौरा करोग। इस प्रतिनिधिमंडल च भाजपा दे राजीव प्रताप रूडी ते अनुराग सिंह ठाकुर हुंदे कन्नो-कन्नो कांग्रेस सांसद मनीष तिवारी होर बी शामिल होंगन।

<><><><><><>

Army-DGMO

भारतीय सेना नै आखेआ ऐ जे भारत ते पाकिस्तान बश्कार ऐतवारें डी.जी.एम.ओ सतह दी गल्लबात दा बैठक दी कोई बी योजना नेई ही। इयां खबर आवा रदी ही जे संघर्ष विराम आरजी हा ते एहू अज्ज खत्म होआ रदा ऐ। भारती सेना नै उनें खबरें गी खारिज करी दित्ता जे भारत ते पाकिस्तान बश्कार डी.जी.एम.ओ सतह दी गल्लबात होनी ऐ। सेना आसेआ दस्सेआ गेआ ऐ जे ऐसी कोई गल्लबात तय नेई ऐ ते सीजफायर गी जारी रक्खने दा जित्थे तगर सौआल ऐ एहूदी कोई म्याद तय नेई कीती गेदी ऐ।

<><><><><><>

Ship-Collision

विश्व सद्भावना जात्तरा दे तैहत अमरीका दे न्यूयार्क शैहर पुज्जे दे मैक्सिको दी नौसेना दा इक ज्हाज शनिवार चिरें रातीं उत्थे दे ऐतिहासिक पुल “बुकलिन ब्रिज” कन्नै टकराई गेआ जेदे कारण चालक दल दे 2 जनें दी मौत होई गेई ते घट्टोघट्ट 19 जनें घायल होई गे। न्यूयार्क शैहरा दे मेयर एरिक एडम्स नै आखेआ ऐ जे हादसे च इक 142 साल पुराने पुल गी कोई बड्डा नुकसान नेई पुज्जा ऐ पर ज्हाजें च सोआर 19 यात्रिएं गी इलाज दी लोड पेई ऐ। उनें दस्सेआ जे गंभीर तौरा पर घायल 4 जनें चा 2 दी मगरा मौत होई गेई जिसलै जे बाकिएं दा इलाज चले करदा ऐ।

<><><><><><>

Agri-Minister

केंद्री राई-बाई मंत्री शिवराज सिंह चौहान होरें अजज महाराष्ट्र च “इक राश्ट्र इक कृषि ते इक टीम” दा लक्ष्य हासल करने दा आहवान करदे होई भारत कृषि अनुसंधान परिषद आई.सी.ए.आर ते होरनें हितधारकें बश्कार नेडमें तालमेल दी जरूरतै पर जोर दित्ता ऐ। नागपुर दे सुरेश भट्ट आडीटोरियम च “विकसित कृषि संकल्प” अभियान पर हितधारकें गी सलाह परामर्श देने लेई आयोजित कार्यक्रम दोरान उनें आखेआ जे उंदी सरकार कृषि वैज्ञानिकें आसेआ कीते जाने आहले तजुर्बे ते नमिएं काडुं गी भलेआं खेत्तरें तगर लेई जाइयै उंदा पूरा-पूरा लाहू करसानें तगर पुजाने लेई दृढ संकल्प ऐ। उनें

आखेआ जे वैज्ञानिक काडुं ते जमीनी सतह पर उंदे इस्तेमाल बश्कार दे छिंडे गी खतम करियै राई-बाई दे खेत्तर च नमां उछाल आंदा जाई सकदा ऐ। उनें आखेआ जे आई.सी.ए.आर दे विज्ञानिकें ग्राएं-ग्राएं च भेजियै करसानें कन्नै उंदी मलाटी कराई जाग जेडे उनेंगी राईबाई दे नमें ढंग-सरिस्ते, उन्नत बनगिएं ते इस्तेमाल ते बीएं दे सुधार ते तरीकेसिर इस्तेमाल बारै जागरूक बनांगन।

<><><><><><>

Sonowal-Sea

बंदरगाह, जहाजरानी ते जलमार्ग मंत्री सर्वानंद सोनोवाल होरें अज्ज आखेआ ऐ जे समुंद्री खेत्तर च महिलाएं गी सशक्त बनाना छडा समानता दा विषे नेई ऐ बल्के इस खेत्तर च नवाचार ते विकास गी बढावा देने आस्तै इक्क कार्यनीतिक अनिवार्यता ऐ। ओह अज्ज मुम्बई च समुंद्री खेत्तर च महिलाएं आस्तै अंतरराष्ट्री दिवस समारोह दे उद्घाटन दे मौके पर बोला रदे हे। कार्जक्रम दा उद्देश्य समुंद्री खेत्तर च चुनौतियें दा समाधान करना ते समुंद्री खेत्तर दे सब्बै खेत्तरें च महिलाएं दी हिस्सेदारी बदाना हा। कार्जक्रम च वरिष्ठ सरकारी अधिकारी ते समुंद्री पेशेवर ते शिपिंग कंपनियां, बंदरगाह प्राधिकरण, शैक्षणिक संस्थान ते अंतरराष्ट्री संगठन दे प्रतिनिधि शामिल होए।

<><><><><><>

Bihar-Election Commission

चुनाव आयुक्त डॉ. विवेक जोशी होरें बिहार दी अपनी जात्तरा दे त्रीए ध्याडे भारत-नेपाल दे सीमावर्ती खेत्तरें च आगामी बिहार विधानसभा चुनाएं आस्तै सुरक्षा बवस्था दी समीक्षा कीती। डॉ. जोशी होरें पच्छमी चंपारण दे बाल्मीकि नगर दे जिला अधिकारियें ते सशस्त्र सीमा बल-एसएसबी दे अधिकारियें कन्नै इक्क बैठक कीती। डॉ. जोशी होरें इस बैठक दौरान अधिकारियें थवां मिली दी जानकारी पर कई सुझा ते प्रस्ताव दित्ते। उनें नेपाल कन्नै लम्मी सीमा सांझा करने आहले वाल्मीकि नगर दे जंगली खेत्तरें ते नदी कनारे स्थित मतदान केंद्रें दा अनुभव हासल करने आस्तै खेत्तर दा दौरा बी कीता। चंपारण खेत्तर दे चुना विभाग दे अधिकारियें कन्नै उच्च सतह दी समीक्षा बैठक दौरान डॉ.

जोशी होरें युवा मतदाताएं दी भागीदारी पर ध्यान केंद्रित करदे होई मतदाता सूची दी जांच कीती। उनें संभावित युवा मतदाताएं दे नामांकन च सुविधा पजाने आस्तै सार्वजनिक जगहें पर क्यू.आर स्कैन कोड स्थापित करने दे निर्देश अधिकारिएं गी दित्ते। निर्वाचन आयुक्त होरें समाज दे सब्बे वर्गे दे मतदाताएं गी भागीदारी सुनिश्चित करने आस्तै समेकित चुनां दा उल्लेख कीता। बिहार दी अपनी जातरा दे चौथे ते खीरी ध्याड़े डॉ. जोशी जिले दी श्रेष्ठ चुनावी कार्ज प्रणाली दे पर्यावेक्षण ते समीक्षा करने आस्तै वैशाली जिले दा दौरा करडन।

<><><><><><>

America-Storm

अमरीका दे केंटकी, मिसौरी ते कई होरनें राज्यें च शक्तिशली तूफान करी 27 लोकें दी मौत होई गई ते कई लोक घायल होई गे। केंटकी च सब्बनें थमां बद्द 18 मौतां होइयां न ते कई लोकें दे गंभीर तौरा पर घायल होने दा बी समाचार ऐ। मिसौरी ते वर्जीनिया च बी लोक मारे गे ते तूफान ते बूहटे डिग्गने करी नुकसान होआ ऐ। मिसौरी च 5 ज्हार थमां बद्द मकानें गी नकसान पुज्जने दी बी खबर ऐ। अधिकारियें सब्बनें थमां प्रभावित इलाकें च आपातकाल दी घोषणा कीती ऐ ते आखेआ ऐ जे हताहतें दी गिनतरी च बाद्दा होई सकदा ऐ।

<><><><><><>

IPL-Cricket

IPL क्रिकेट च अज्ज दा मुकाबला दिल्ली दे अरूण जेटली स्टेडियम च दिल्ली कैपिटल्स ते गुजरात टाइटन्स बश्कार खेड्ढेआ जाग। मैच संझा साड्डे 7 बजे शुरू होग। गुजरात दी टीम 11 मुकाबले सोआं 16 अंक लेइयै तालिका च दुई थाहर पर ऐ ते अज्जै दा मुकाबला जित्तने मगरा ओहदा प्लेऑफ च पुज्जना पक्का होई जाग। दिल्ली दी टीम दे 11 मुकाबले सोयां 13 अंक न ते ओह 5मीं थाहर पर ऐ। तोआई, पिछले बरे दे विजेता कोलकाता नाइट राइडर्स दी टीम प्रतियोगिता थमां बाहर होई गई ऐ

कीजे कल संझा भारी बरखा कारण बिजन टॉस दे गै रायल चैलेंजर्स ते कोलकाता नाइट राइडर्स दा मैच रद्द होई गोआ हा।

<><><><><><>

Weather

मौसम विभाग नै कोंकण ते मध्य महाराष्ट्र दे कोल कच्छ आहले खेत्तरे आस्तै ओरेंज अलर्ट जारी कीता ऐ। विभाग मूजब कल थमां 25 मई तगर कई इलाके च मौलेधार बरखा होने दी मेद ऐ। विभाग नै महाराष्ट्र ते एहदे आले-दोआले दे खेत्तरे च मछुआरे गी 5 दिने आस्तै तटीय खेत्तरे पर नेई जाने दी चेतावनी जारी कीती ऐ। दक्खन महाराष्ट्र-गोवा तट पर 19 मई थमां 20 मई बश्कार 45 थमां 55 किलोमीटर प्रति घंटे दी रफतार कन्नै ब्हा चली सकदी ऐ।

<><><><><><>